



Na osnovu člana 72. Statuta Naše stranke, Kongres Foruma mladih Naše stranke donosi:

## **PRAVILNIK O RADU FORUMA MLADIH NAŠE STRANKE**

### **1. OSNOVNE ODREDBE**

#### **Član 1.**

- (1) Pravilnik o radu Foruma mladih Naše stranke (u daljnjem tekstu: Forum mladih) uređuje svoj naziv, znak, sjedište, ciljeve, prava i obveze svojih članova, unutrašnju organizaciju i organe, te odredbe o njihovom izboru, razrješenju i trajanju mandata, ustrojstvo lokalnih i kantonalnih organizacija te ostala pitanja važna za rad Foruma mladih.
- (2) Na pitanja rada i djelovanja Foruma mladih koja nisu uređena ovim Pravilnikom, na odgovarajući način primjenjuju se odredbe Statuta Naše stranke (u daljnjem tekstu: NS).
- (3) Terminološko korištenje muškog ili ženskog roda u ovom Pravilniku podrazumijeva uključivanje oba roda.

#### **Član 2.**

- (1) Forum mladih je organ NS koji okuplja članove NS do 30 godina i djeluje u skladu sa Pravilnikom Foruma mladih i Statutom NS.

- (2) Forum mladih je autonoman u svom radu, organizovanju sopstvenih aktivnosti, kao i u pogledu izbora svojih organa.
- (3) Forum mladih kao organ NS ima za cilj realizaciju programskih ciljeva NS i politika Foruma mladih.
- (4) Forum mladih djeluje u skladu sa svojim politikama u cilju okupljanja što većeg broja mladih ljudi, rješavanju ključnih problema mladih definiranih kroz Politike Foruma mladih, te širenje socijal-liberalne ideje.

### **Član 3.**

- (1) Rad Foruma mladih je u načelu javan.
- (2) Javnost se može ograničiti u izuzetnim slučajevima.
- (3) Izuzetnim slučajevima se smatra rasprava o unutarorganizacijskim pitanjima i pitanjima koja su od strane Predsjedništva NS proglašena tajnim.

## **2. NAZIV, ZNAK I SJEDIŠTE**

### **Član 4.**

- (1) Puni naziv Foruma mladih je: Forum mladih Naše stranke, odnosno skraćeni naziv: FMNS.
- (2) U radu i djelovanju izvan područja Bosne i Hercegovine, Forum mladih koristi i naziv: Youth Forum of Naša stranka, odnosno skraćeni naziv: YFNS.

### **Član 5.**

- (1) Forum mladih ima svoj znak (logo).
- (2) Izgled znaka integralni je dio ovog Pravilnika.
- (3) Predsjedništvo Foruma mladih posebnom odlukom uređuje način upotrebe znaka, kao i njegove grafičke standarde.

### **Član 6.**

- (1) Sjedište Foruma mladih je: u Sarajevu, ul. Branilaca Sarajeva 5/1, u sjedištu NS.

### 3. ČLANSTVO

#### Član 7.

- (1) Članom Foruma mladih smatra se svaki potpisnik online pristupnice Foruma mladih u dobi od 16 do 30 godina.
- (2) Potpisivanjem pristupnice, član iskazuje prihvatanje Pravilnika Foruma mladih i članskih prava i dužnosti.
- (3) Svaki član Foruma mladih pripada lokalnoj ili kantonalnoj organizaciji Foruma mladih prema mjestu prebivališta i ima mogućnost biti članom lokalne organizacije NS.

#### Član 8.

- (1) Prava i dužnosti člana proističu iz njegove opredjeljenosti da se aktivno uključi u ostvarenje programskih ciljeva Foruma mladih.
- (2) Obaveze članova Foruma mladih su poštivanje odredaba Statuta NS i Pravilnika Foruma mladih, aktivno učestvovanje u radu organizacije i organa Foruma mladih, učestvovanje u određivanju programa i sadržaja aktivnosti i načinu njihovog ostvarivanja, neposredno angažovanje u ostvarivanju zadataka.
- (3) Prava svakog člana su: aktivno i ravnopravno učestvovanje u raspravama koje se vode na sjednicama Foruma mladih ili drugim organima stranke, aktivno učestvovanje u procesu donošenja odluka koje su u nadležnosti njegove osnovne organizacije Foruma mladih i tijela čiji je član, da predlaže, bira i bude biran u sve organe Foruma mladih, da organima Foruma mladih upućuje prijedloge i pitanja koja se odnose na njihov rad i da od njih traži i dobija odgovore, da prema svojim sklonostima i interesovanjima učestvuje u aktivnostima Foruma mladih.

#### Član 9.

- (1) Članstvo u Forumu mladih prestaje:

- istupanjem iz članstva;

- isključenjem iz članstva;

- učlanjenjem u drugi politički podmladak, političku stranku ili kandidiranjem na listi druge političke stranke, odnosno na nezavisnoj listi bez saglasnosti Predsjedništva Foruma mladih i/ili Predsjedništva NS;

- smrću.

- (2) Članu koji obnaša funkciju u organima Foruma mladih mandat prestaje sa navršениh 30 (trideset) godina.

## **4. ORGANI I TIJELA**

### **Član 10.**

(1) Organi Foruma mladih su:

- Kongres,
- Predsjedništvo Foruma mladih.

### **4.1. KONGRES**

#### **Član 11.**

- (1) Kongres Foruma mladih ( u daljem tekstu: Kongres) je najviši organ Foruma mladih.
- (2) Kongres može biti redovni (izborni ili izvještajno-tematski) i vanredni (izborni ili izvještajno-tematski).
- (3) Redovni kongres održava se svake 2 (dvije) godine.
- (4) Izvještajno-tematski kongres održava se prema potrebi, na temelju odluke Predsjedništva Foruma mladih.
- (5) Kongres saziva predsjednik Foruma mladih ili Predsjedništvo Foruma mladih.
- (6) Predsjednik Foruma mladih dužan je sazvati Kongres na zahtjev najmanje 5 (pet) lokalnih ili 3 (tri) kantonalna Foruma mladih, odnosno na zahtjev najmanje 2/3 članova Predsjedništva.

#### **Član 12.**

(1) Kongres je nadležan da:

- donosi Pravilnik o radu Foruma mladih;
- donosi odluke, deklaracije i druge akte iz svoje nadležnosti;
- raspravlja i donosi odluku o međunarodnoj i regionalnoj saradnji s političkim podmladcima drugih političkih stranaka;
- raspravlja i donosi odluku o pristupanju međunarodnim organizacijama za mlade i djelovanju u okviru istih, koju potvrđuje Glavni odbor NS;
- raspravlja i prihvaća izvještaje o radu Predsjedništva Foruma mladih;
- tajnim glasanjem razrješava i bira predsjednika Foruma mladih;

· tajnim glasanjem razrješava i bira potpredsjednika Foruma mladih;

· obavlja druge poslove utvrđene Poslovníkom o radu.

(2) Rad Kongresa uređuje se Poslovníkom o radu kojeg donosi Kongres na početku svog zasjedanja, a na prijedlog predsjednika.

## **4.2. PREDsjedništvo FORUMA MLADIH**

### **Član 13.**

(1) Predsjedništvo Foruma mladih (u daljnjem tekstu: Predsjedništvo) čine:

- predsjednik,

- potpredsjednik,

- sekretar,

- po 2 (dva) predstavnika kantonalnog Foruma mladih,

- po 1 (jedan) predstavnik lokalnog Foruma mladih, pod uslovom da u tom kantonu ne postoji kantonalni Forum mladih.

(2) Pri izboru predsjednika, potpredsjednika, sekretara i međunarodnog sekretara potrebno je uložiti maksimalne napore kako bi se ostvarila ravnopravna zastupljenost oba spola.

(3) Predstavници kantonalnog Foruma mladih trebaju biti osobe suprotnog spola.

### **Član 14.**

(1) Predsjedništvo:

- Upravlja Forumom mladih između dva Kongresa,

- Donosi dokumente koji određuju rad Predsjedništva,

- Imenuje sekretara,
- Imenuje međunarodnog sekretara,
- Imenuje predstavnika u Predsjedništvu NS,
- osniva interesne odbore i koordinira njihov rad,
- organizira i podstiče dodatno obrazovanje članova Foruma mladih,
- Donosi odluke kojima se formiraju ili raspuštaju lokalni i kantonalni Forumi mladih,
- Donosi zaključke koji su obavezujući za sve organe i tijela Foruma mladih, te okvirno operativne programe i planove rada.

### **Član 15.**

- (1) Predsjedništvo može donijeti odluku o poništavanju izbora i raspuštanju organa lokalnih i kantonalnih organizacija Foruma mladih, te sazvati Zbor članstva u istim.
- (2) Predsjedništvo prilikom poništavanja izbora organa, odnosno raspuštanja organa dužno je donijeti mjere kojima se osigurava funkcionisanje organizacije, te utvrditi obaveze viših nivoa organizovanja u tom procesu.
- (3) Do izbora novih organa Predsjedništvo imenuje povjerenika ili povjereništvo koje je dužno u roku od 90 dana organizirati Zbor članstva.
- (4) Prijedlog za poništavanje izbora i raspuštanje organa lokalnih i kantonalnih organizacija Foruma mladih može podnijeti predsjednik ili 1/3 članova Predsjedništva.
- (5) Predsjedništvo odluku o raspuštanju organa lokalnih i kantonalnih organizacija Foruma mladih može donijeti u slučajevima:
  - grubog kršenja ili nepostupanja po odredbama Pravilnika Foruma mladih, Statuta NS ili odlukama organa Foruma mladih,
  - neizvršavanja obaveza koje proističu iz odluka viših organa Foruma mladih,
  - zastoja u njihovom radu kojim se ugrožava djelovanje Foruma mladih,
  - djelovanja koje je suprotno osnovnim političkim i programskim ciljevima Foruma mladih i NS.
- (6) Protiv ove odluke organ koji je raspušten u roku od 10 (deset) dana može podnijeti žalbu Glavnom odboru NS koji donosi odluku na prvoj narednoj sjednici. Odluka Glavnog odbora ja konačna.

### **4.3. PREDSJEDNIK I POTPREDSJEDNIK**

#### **Član 16.**

- (1) Predsjednika Foruma mladih bira Kongres.
- (2) Dužnosti predsjednika su:
  - predstavljanje Forum mladih u javnosti,
  - sazivanje sjednica Predsjedništva,
  - obavljanje poslova vezanih za povezivanje i koordiniranje rada organa i tijela Foruma mladih,
  - iniciranje i nadziranje realizacije odluka donesenih na organima Foruma mladih,
  - provođenje odluka koje mu povjeri Predsjedništvo.
- (3) Predsjednik Foruma mladih ne može biti istovremeno predsjednik lokalnog ili kantonalnog Foruma mladih.

#### **Član 17.**

- (1) Potpredsjednika Foruma mladih bira Kongres.
- (2) Dužnosti potpredsjednika su:
  - da zamjenjuju predsjednika u slučaju njegove odsutnosti, a po njegovom ovlaštenju,
  - odgovornost za jačanje organizacije i uspješnost njenog djelovanja prema raspodjeli zadataka koja se usvaja na Predsjedništvu,
  - staranje o obavljanju drugih zadataka koje njemu povjeri Predsjedništvo.

### **4.4. SEKRETAR**

#### **Član 18.**

- (1) Sekretara bira Predsjedništvo na prijedlog predsjednika na prvoj konstituirajućoj sjednici.
- (2) Sekretar ne mora biti izabran iz reda članova Predsjedništva.
- (3) Dužnosti sekretara Foruma mladih su:
  - vođenje zapisnika na sjednicama Predsjedništva,
  - vođenje evidencije članstva.

#### **4.5. MEĐUNARODNI SEKRETAR**

##### **Član 19.**

- (1) Međunarodnog sekretara imenuje Predsjedništvo na prijedlog predsjednika ili najmanje 1/3 članova Predsjedništva na prvoj konstituirajućoj sjednici.
- (2) Međunarodni sekretar se bira iz reda članova Predsjedništva.
- (3) Dužnosti međunarodnog sekretara su:
  - predstavljanje Foruma mladih u međunarodnim organizacijama čiji je Forum mladih član,
  - uspostavljanje saradnje sa drugim podmladcima liberalnih političkih stranaka u regionu, evropi i svijetu,
  - podnošenje izvještaja Predsjedništvu o statusu i aktivnostima Foruma mladih u međunarodnim i regionalnim organizacijama čiji je Forum mladih član,
  - informisanje drugih članova Foruma mladih o aktivnostima u kojima mogu učestvovati u organizaciji međunarodnih i regionalnih organizacija čiji je Forum mladih član.

#### **4.6. PREDSTAVNIK U PREDSJEDNIŠTVU NS**

##### **Član 20.**

- (1) Predstavnik Foruma mladih u Predsjedništvu NS imenuje Predsjedništvo na prijedlog predsjednika ili najmanje 1/3 članova Predsjedništva na prvoj konstituirajućoj sjednici.
- (2) Predstavnik se bira iz reda članova Predsjedništva.
- (3) Obaveza predstavnika je
  - zastupati odluke koje donese Predsjedništvo,
  - zastupati interese članova Foruma mladih,
  - podnositi redovno Predsjedništvu izvještaj sa sjednica Predsjedništva NS.

## 5. SJEDNICE PREDSDJEDNIŠTVA

### Član 21.

(Sazivanje sjednica)

- (1) Sjednice Predsjedništva saziva i predsjedava im predsjednik Foruma mladih.
- (2) Sjednice Predsjedništva održavaju se najmanje jednom u tri mjeseca ili ranije na zahtjev predsjednika, sekretara ili najmanje 1/3 članova Predsjedništva. Na zahtjev najmanje 1/3 (jedne trećine) članova Predsjedništva, predsjednik je dužan sazvati sjednicu u roku od 7 (sedam) dana od dana zaprimanja zahtjeva.
- (3) Dnevni red za sjednicu kao i pripremu pisanih materijala koji će biti na dnevnom redu određuje predsjednik Foruma mladih u saradnji sa sekretarom. Prijedlog za dnevni red članovi dostavljaju predsjedniku, koji predlaže dnevni red svake sjednice. O dnevnom redu redovne sjednice se glasa na sjednici.
- (4) U dnevni red vanredne sjednice ulaze samo ona pitanja radi čijeg je razmatranja vanredna sjednica sazvana. Dnevni red vanredne sjednice se ne može dopunjavati i o njemu se ne glasa. Tačku dnevnog reda, ukratko predstavlja i na raspravu daje onaj član Predsjedništva koji ju je predložio.
- (5) Članovi Predsjedništva dužni su prisustvovati sjednicama. U slučaju spriječenosti, svaki član je dužan da svoj izostanak opravda 24 sata prije početka sjednice.
- (6) Predsjedništvo donosi pravovaljane odluke natpolovičnom većinom prisutnih, ukoliko sjednici prisustvuje natpolovična većina ukupnog broja članova Predsjedništva.
- (7) Pri odlučivanju se ubrajaju i glasovi poslani elektronskim putem (e-mail ili Skype), telefonskim putem (pozivom ili tekstualnom porukom), pod uslovom da su članovi koji glasaju na ovaj način, opravdano onemogućeni prisustvovati sjednici, a upoznati su sa dnevnim redom tj. sa predmetom glasanja.
- (8) Sekretar Predsjedništva je obavezan da u slučaju elektronskog načina glasanja utvrdi tehničke uslove za ovakvu vrstu glasanja i o tome obavijesti pravovremeno predsjednika.
- (9) O radu sjednice Predsjedništva vodi se zapisnik koji se dostavlja svim članovima Predsjedništva na usvajanje.
- (10) Zapisnik potpisuju sekretar i predsjednik. Zapisnik vodi sekretar, a u koliko je odsutan, predsjednik imenuje zapisničara na početku sjednice.

## **Član 22.**

(Tok sjednice)

- (1) Za svaku tačku dnevnog reda sjednice Predsjedništva, po potrebi se može voditi rasprava.
- (2) Rasprave su ograničene na komentare i repliku svakog zainteresovanog člana Predsjedništva, nakon čega se pristupa donošenju zaključka.
- (3) Komentar u raspravi se ograničava najviše na 10 (deset) minuta vremena. Replika na komentar se ograničava na trajanje od 5 (pet) minuta. Odgovor na repliku se ograničava na 2 (dvije) minute.
- (4) Na zahtjev članova Predsjedništva, predsjednik je dužan napraviti pauzu od 5 (pet) minuta u ovu svrhu.
- (5) Svi članovi su dužni voditi računa o načinu komuniciranja, što podrazumijeva:
  - nekorištenje neprikladnih riječi u diskusiji;
  - vrijeđanje;
  - što je više moguće argumentovano izlaganje;
  - što je više moguće poštivanje gender senzitivnog jezika;
  - neprekidanje tuđeg izlaganja, osim ukoliko ono prelazi stavom (3) ovog člana propisano vremensko ograničenje.

## **Član 23.**

(Komunikacija)

- (1) Elektronska komunikacija između članova Predsjedništva dopuštena je samo u hitnim slučajevima, pod okolnostima u kojima je članovima onemogućeno da prisustvuju sjednicama Predsjedništva, te na inicijativu predsjednika Foruma mladih.
- (2) Svi članovi Predsjedništva obavezni su, u slučaju elektronskog upita o određenom predmetu, odgovoriti, tj. dati svoje mišljenje i eventualne prijedloge u roku od 2 (dva) dana, od dana kada i im je poslan e-mail.
- (3) E-mail komunikacija je obavezno otvorena i dostupna svim članovima Predsjedništva.

## **Član 24.**

(Interesni odbori)

(1) Predsjedništvo može imenovati interesne odbore koji imaju 3 (tri) ili više članova, po potrebi. Na čelu ovih tijela se među izabranim bira koordinator, koji organizuje i koordinira rad, i odgovoran je za rezultate rada interesnog odbora.

(2) Koordinator interesnog odbora dužan je podnijeti, po potrebi, pismene izvještaje sekretaru ili informisati Predsjedništvo na sjednici.

## **6. ORGANIZACIJSKA STRUKTURA**

### **Član 25.**

(1) Forum mladih se organizuje na lokalnom i kantonalnom nivou.

(2) Djelovanje ovih organizacija uređuje se Poslovníkom o radu svake od organizacija u skladu sa Pravilnikom o radu Foruma mladih i Statutom NS.

### **6.1. LOKALNI ODBOR FORUMA MLADIH**

#### **Član 26.**

(1) Za osnivanje Lokalnog odbora Foruma mladih (u daljnjem tekstu: Lokalni odbor) potrebno je minimalno 5 (pet) članova, uključujući predsjednika, potpredsjednika i sekretara.

(2) Predsjedništvo potvrđuje osnivanje Lokalnog odbora nakon što predsjednik dostavi Poslovník o radu, te imena predsjednika, potpredsjednika i ostalih članova Lokalnog odbora.

(3) Predsjednik Lokalnog odbora ne može biti istovremeno predsjednik Kantonalnog odbora Foruma mladih.

## **6.2. KANTONALNI ODBOR FORUMA MLADIH**

### **Član 27.**

- (1) Za osnivanje Kantonalnog odbora Foruma mladih (u daljnjem tekstu: Kantonalni odbor) potrebno je minimalno 11 (jedanaest) članova, uključujući predsjednika, potpredsjednika i sekretara.
- (2) Predsjedništvo potvrđuje osnivanje Kantonalnog odbora nakon što predsjednik dostavi Poslovnik o radu, te imena predsjednika, potpredsjednika i ostalih članova Kantonalnog odbora.
- (3) U skladu sa članom 32. Statuta NS, predsjednik Kantonalnog odbora je član Glavnog odbora NS.

## **7. ODLUČIVANJE U FORUMU MLADIH**

### **Član 28.**

- (1) Odluke organa Foruma mladih donijete na sjednicama organa, javnim ili tajnim glasanjem, su obavezujuće.
- (2) Odluku o načinu glasanja, donosi organ Foruma mladih javnim glasanjem.
- (3) Za punovažan rad i odlučivanje u organima Foruma mladih potrebno je postojanje kvoruma, koji je ispunjen ukoliko je prisutno više od polovine od ukupnog broja članova.

### **Član 29.**

- (1) Odluke u organima Foruma mladih donose se većinom glasova prisutnih članova, osim u slučajevima izričito navedenim ovom Odlukom.
- (2) Izbor članova organa Foruma mladih vrši se tajnim glasanjem.

## **8. KANDIDACIONI POSTUPAK**

### **Član 30.**

(1) Prilikom kandidovanja članova za izbor u organe Foruma mladih, ukoliko prilike to dozvoljavaju, potrebno je voditi računa o spolnoj i teritorijalnoj zastupljenosti članova.

(2) Svaki član Foruma mladih ima pravo da predlaže, bira i bude biran u sve organe Foruma mladih i niti jedan organ Foruma mladih svojim odlukama ili drugim aktima ne može ograničiti ovo pravo.

## **9. TRAJANJE MANDATA I NESPOJIVOST FUNKCIJA**

### **Član 31.**

(1) U slučaju nespojivosti funkcija ili spriječenosti u obavljanju funkcije, ukoliko nema ovim Pravilnikom predviđene zamjene imenuje se vršilac dužnosti.

(2) Nespojivost funkcije podrazumijeva višestruko obnašanje funkcija unutar istog oblika organizovanja, odnosno višestruko obnašanje funkcija unutar istog organa ili tijela, kao i nespojivost funkcija propisanih Statutom Naše stranke.

(3) Trajanje mandata na svim nivoima organizovanja je 2 (dvije) godine od dana izbora ili imenovanja, uz mogućnost jednog ponovnog izbora na istu poziciju, ali ukupno ne duže od 4 (četiri) godine.

## **10. FINANSIRANJE**

### **Član 32.**

(1) Aktivnosti Foruma mladih se finansiraju iz:

- sredstava Naše stranke,
- projekata koje osmisli Forum mladih i
- donacija.

## **11. IZVJEŠTAVANJE**

### **Član 33.**

- (1) Predsjednici Lokalnog i Kantonalnog odbora Foruma mladih podnose Predsjedništvu izvještaj o radu za prethodnu godinu do 1. februara tekuće godine.
- (2) Predsjednik Foruma mladih podnosi Predsjedništvu NS i nižim organima Foruma mladih izvještaj o radu do 1. marta tekuće godine.

## **12. ZAVRŠNE ODREDBE**

### **Član 34.**

- (1) Izmjene i dopune Pravilnika vrše se na način i po postupku propisanim za njegovo donošenje.
- (2) Stupanjem na snagu ovog Pravilnika prestaju važiti Poslovnici o radu lokalnih i kantonalnih organizacija Foruma mladih.
- (3) Organi Foruma mladih su dužni prilagoditi svoju strukturu i organizaciju odredbama ovog Pravilnika u roku od 30 dana od stupanja na snagu.
- (4) U slučaju nedorečenosti odredbi Pravilnika, analogijom se primjenjuje Statut NS.
- (5) Za tumačenje je nadležno rukovodstvo Foruma mladih u prvom stepenu, a u drugom Predsjedništvo NS.

### **Član 35.**

- (1) Pravilnik stupa na snagu i primjenjuje se danom donošenja.

### **Broj:**

**Predsjedavajući Kongresa Foruma mladih Naše stranke**